

LIBRES E EVENC

Enrescir le »Città invisibili«

Margherita Detomas à rejonà de sie liber tel chèder de la scontrèdes con i autores de la biblioteca de Cianacei

Na trentina de persones, che en temp de Covid volessa dir la Sala Consiliare del comun de Cianacei piena. Chest l'è stat l bon ejit de la scontrèda stata en vender ai 21 de aost con la scritora – te chest cajo, ajache zenza de profescion l'è na giornalista de Rai Ladinia – Margherita Detomas tel chèder de la belota scontrèdes con i autores endrezèdes via per l'istà dal bibliotecarie Domenico Volcan.

La scontrèda la é pontèda via col recort che à volù meter dant Volcan per la manconia sozeduda 24 ores dant con la mort de Rinaldo Cigolla: »L'è stat na gran menciónza – à dit l bibliotecarie – tant per la comunanza de Cianacei che per duta la val, che à perdù n sportif e gran, gran artist«.

La parola la é donca passèda a la protagonista de la scontrèda, domanèda sobito fora sa la costion Coronavirus e sun sia sensazioni en cont de chest: »Gio l'è vivù desche possibilità de crescita personala, de progress e evoluzion profescionala. Se à abù l met de pissar a valores fogn e gregn ideai. La pouira te muda, se no tu ge lasce aer la soramessa. De gra a mie lurier é podù veder i dac senestres, ma ence na gran ona de solidarietà e chest l'è stat l'aspet più bel. Chel manco bel enveze seguramenter la distanza

soziala, descheche sion senté dalonc noi chiò chesta sera, na distanza che riscia de mudar i raporc umans«.

Leopoldo Rizzi à dit che »Margherita l'ha chieri con sie percors n segnificat fon de la vita, Città Invisibili l'è en fin dei conts noscia enèma. De gra a sia pascion l'ha arjont n resultat eccezionèl, tant dal pont de veduda letterèr che da chel tecnich-scientifich.«

»Città invisibili«, apontin chest l titol del liber portà dant da les 9 da sera te la sala comunèla, l'è n'opera de zirca 400 piates che conta la storia de Percy H. Fawcett, spari dessema al fi e n amich endèna na spedizion te l'Amazonia.

Margherita Detomas, ence tras dias, l'ha podù meter dant ai uditores sia esperienzes de enrescida portèdes inant te passa 20 egn tel Brasil, olache desfrutan la feries la se à troà più outes su la pedies de Fawcett: »Chesta storia la é nasciuda jun Busan – l'ha contà l'autora – olache é cognosciù l lessicograf, tradutor e esplorator Timothy Paterson.

Dò l'aer cognosciù l'è envià te Fascia e l'è te noscia val che el à dapodò passà soe ferie per zirca 10 egn. Zacan l me à tinultima contà che aesse cognù jir con el tel Brasil, ajache aló l'era na bela storia da skriver... e chiò l'è sutà ite Fawcett.«

Percy H. Fawcett, desvani tel Mato Grosso del 1925 con so fi e n amich de so fi l'era defat l bèrba de Paterson per via de n maridoz. Sia sparizion la é n muie cognosciuda, soraldut ti ambienc ingleisc, olache la é doentèda lejenda. Chesta costion l'ha cuscita ispirà n muie de stories, tant letterères che filmografiches, per fèr vèlch ejempie bèsta pissèr a inomes desche Arthur Conan Doyle, Ian Fleming o l personaje Indiana Jones.

»Cuscita – é jita inant l'autora de Città Invisibili – é scomenzà a jir tel Brasil, vigni an dal 1996. A San Paulo, la pruma outa, e dapò più a nord tel Mato Grosso, envers l'Amazonia, vidada da Timothy Paterson a la descuerta de n mond pien de misteres, chierian segnes de ziviltà veiore e emparan la cultura de la popolazioni de anchecondi.«

Entenù che l'Amazonia l'era un di lesc manco studiè da la comunità scientifica, Margherita Detomas à cernù tinultima de skriver chest liber, per didèr a averjer i eies de la jent e di studiosc. Con la curiosità de na esploradora e l rigor de na profescionista de l'informazion, la fascèna l'ha publicà l liber vegnù fora a la fin del 2019 per WriteUp Site, en colaborazion con Viaggi nel tempo Editore, che l reiona apontin de ricostruzioni storiches, de ziviltà

veiores e resc archeologics, de mic e figures lejendères, dut cant sul troi che investighea le »zità che no se veit più«: n grum de neves de gran enteress vegnudes fora da la longia esperienzes tel sudamerica.

»Canche sention che i taa le piante del polmon vert del mond, te l'Amazonia, aon ressentiment – l'ha dit amò – ma canche l'è l moment però chel teritorie no à gran atenzion da man di studiosc. Mia volontà l'era apontin chesta: gio no son na enrescidora, son na giornalista... e da giornalista é volù meter en esser n'opera de divulgazion, crear enteress tel mond de l'academia e de l'università. E son stolza de dir che à joà perché dò la publicazion più che n'outa son stata contatada da jent che se à decidù a portar inant studies de chest vers. Fawcett l'era esplorador, enrescidor e geograf, l'aea dit che la soluzion del mister de l'America del Sud aessa podù vegnir fora demò canche fossa stat troà e studià chele zità veiore, zità che no se veit più, e l'aea dit de esser segur che chele Città invisibili da valch man te la forestes le...«. Da veder olè, per endèna Margherita Detomas portarà sie Città invisibili a Roma de setember, al National Geographic, l festival de la sciences.

Daniele Verra



Margherita Detomas à presentà si liber tel program de scontrèdes con l'autor de Cianacei endrezèdes dal bibliotecarie Domenico Volcan.

